

Nlir nnap-nlà aBulus ônəm Inan oga AKorinti ngga mparəm

¹ Nlir nnap-nlà va ta fa ka atak mi uBulus va unəm uga nre aYesu kəristi ka atak ndom Inan a. Mmami nzəng ku uTimoti ugənanng mi ka ashe aKəristi. Nnap nlà va ta fa na a ga atak ikilisiya Inan va kaKorinti nzəng ka aboshi nkpaktak onəm Inan va ka ashe nkpaktak mbin Akaya.

² Re nnap nnənan ka nra-igwak Inan uPon ku uPonzhi yi uYesu Kəristi a təm nzəng ká wo.

UBulus na adəngchi iNan

³ Adəngchi təm aji Inan chit uPon aPonzhi yi uYesu Kəristi. Uza wa uPon uga nrwa igwak. Uwa Inan va nyi asak pa kpaktak.

⁴ Uwa kà nsak yi ka ashe nkpaktak ndaktak yi. Kakul na i nyi nsak onəm va ka ashe nza apir ndaktak nggo ká apir asak va í ya ka atak Inan va sak yi a.

⁵ Kakul wa nva i bək anung pa zhalat zhalat kakul aKəristi te, wa nnà ta kpa i ya asak pa makmak ka atak aKəristi.

⁶ A yà pa ma ka nnyan ka yi te, ya kakul pa na i sak wo. Na o ya nkamshi Inan kpa. A yà pa mí sak yi te, ya kakul pa na i nyi nsak wo. Apir asak va i nak wo o kar igwak ka apir mbək anung va mmayi ka nfe ka a.

⁷ Igwak kam yi byet ka apal ishi wo. Kakul i nyinyi pa wa nva mmawó ka nfe ka mbæk anung nzeng ka yi te, wa nnà ta í sak owan yi ká izèzèr.

⁸ Ógènanng, i dom wo pa o tèm ka ashe nfo ka apal ishi mbæk anung va i fe ka ka mbin Asiya kat. I bæk anung pa zhalat zhalat har i rən pa i lár lap kat.

⁹ A nèm ka yi bu là pa ma gəl akwali ikú ayi chit. Ka nna kpa te, iyam va ta ya yi na a nak kan i tēp nkam ká izèr yi kat. I tēp nkam ká izèr yi kat. I tēp nkam ká Inan va i won ka onəm-kuku ka atak ikú.

¹⁰ Uza kamshi yi chit i fa ka ashe nsur mbángbàng ngga ikú. Uza i kamshi yi kam kadi i fa ka ashe nsur. Í nak igwak yi ku uwa pa uza i kamshi yi kam kadi i fa ka ashishe

¹¹ a yà pa mmawó ka nkamshi yi ka atak nnəm aduwa a. Na onəm pa kyak a na dèngchi íNan. Oza a na adèngchi kakul nnap nnənən va Inan nyám ayi ka atak nfe achal onəm pa kyak kakul yi.

UBulus bat achen wò

¹² Iyam va ta í lan ká pa shat. Idímdím igwak yi ka nla ayi pa akwam ro ya ka ashe ntəm yi kapambin va ta kat. I nèm pa ká igwak pa izən. Akwam ro yà ká ishimshe yi ká Inan kat. Ishimshe yi ká wo te, n-yà akwam va ta kat a dudon jiwo. I nèm iyam va ta ka aghan anəm kat. I nèm ka atak ichumchum nnap nnənən Inan.

¹³ Mmayi ka nlir awo iyam va i mat wo ka nkun, kat te ka nkpan ipipir kat. N nak igwak pa o kpan ipipir kpan pa kpaktak.

¹⁴ N-yanmata te, o nyi nnap va ta chit kùr kaṭ. Nna pa ká ilum nvan a Ponzhi-Yesu te, ó nok ka yi pa shat wa nva i ga nlan ká wo a.

¹⁵ Kakul pa n nyinyi pa ì yiya wanta te, ka n yar chit pa mi ba atak wo mpyal na o kam nnap nnənan nvan pa mparəm.

¹⁶ Kakul ka n yar pa mi ru ngga mbin aMakidoniya te, mi sat ka atak wo kan mi watar. N yar pa mi ru nlele kaMakidoniya te, mi sat kàḍi ka atak wo na o re mi ka nre ka mbin a Yahudiya.

¹⁷ Ka n là pa mi nəm iyam va ta te, n là nnap va achu pa parəm ḍakbo? N nəm iyam va ta wa anəm na pa kùk dò? Uwa là n à, kaṭ te n o'o ka apal ishi nnap nzəngtəng i ḍak na kaṭ a?

¹⁸ Wa nva Inan nsar nnap-nləla yəl awo yəl, akwam ro yà ka kaṭ te, wa nnà ta kpa iyam va i là awo te, apir nnap-nlà ngga nla n à, ka n o'o ka anung zəngtəng kaṭ.

¹⁹ Kakul uYa Inan uYesu Kəristi va mmami ka uSilvanus ka uTimoti í là nnənap awo te, nnap-nlà ngga aparpar ngga nla n à, ka n o'o ka anung zəngtəng ro yà ka ashishe kaṭ. Nnandər ngga nsat ka apal nnap-nlà va uza man ka te, nna chwat ka ashishe.

²⁰ Kakul nkpaktak nsar nnap-nlà Inan te. a yəl ka ashe a wà wa nva Inan là. A nak te, i là <<nna a təm.>> Ka ashe aḍin a wà kakul nna ichumchum Ìnan.

²¹ Inan uwa ká ishi wò i nak yi nzəng ká wo i tong i kam ka ashe aKəristi. Uza yak yi na inok ayi.

²² Uza bap yi chit na a nyám pa mmayi ojini. Uza nak aRuhu wò chit ka ashe igwák yi na a nyám pa

kpátkpát pà uza i yél nsar nnap-nlà wò yél ayi.

²³ Mmami ka ngwór Inan pà a là pà mmami ka nnap akwam nggo ka apal ishi nnap va ta. Nna pà mi ba aKorinti lap ka kakul pà n dom nre wo pa pa kwák a.

²⁴ Mmayi ka nnyam ichumchum awo ka apal ishi nnap nna nnandər ka. Mmayi ka nnəm inok nzəng ká wo na a nchang igwak awo. Kakul o tong kəkam ka ashe nna nnandər wo.

2

¹ Iyam va nak kan m ba atak wo wa nva ka n là ka te, kakul pa kan mà ba mba ngga ndunshi anung igwak awo ka.

² Kakul a ya pa mi dungshi anung igwak awo te, uda uwa ya lap i nak igwak i chang mi, i watar mmawó va n dungshi igwak awo ya?

³ Awasika va ka n lir awo te, n lir wanta na n won m ba te, kan onəm va i nak igwak i chang mi te, oma a le a ya onəm oga nnak igwak a lak mi ka. Kakul n nyinyi pa a ya pa mmami ka ashe nchang igwak te, nkpektak wo ka ashishe na kpa.

⁴ Ka n lir iyam va ta awo te, a dak igwak mi pa makmak. Igwak dungshi mi pa makmak. N lir te, iwu mi mbəl na pa gbai. N lir pa na n nak igwak a lak wo ka. N dom pa na a nak wo o nyi apir mman mmakmak va mmami ka kakul wo a.

N-yar nnap-mbángbang únəm uga mpat nnap

⁵ Unəm va nak igwak lak wo te, uza lak igwak mmami ka, uza lak nkpektak wo. Ka te, i là pa uza lak óro ka ashe wo kakul n dom pa n là a rwa wo nna ka.

⁶ Unəm va ta te, nnyam-ntan va onəm va oma yél ji nyám á na te, a kùkùr.

⁷ I bíbyen pa o yar nnap-mbángbang á na. O kam ìgwak á na kakul le kan nlak-ìgwak mmak-mak a ji ishi nkəkam ka.

⁸ Kakul nva ta te, mmami ka nchal wo pa o nak na uza a nyi kàdī pa o maṇ na maṇ.

⁹ Ka n lir awasika va ta awo kakul n dom pa m mà wo na n nyi mo te, ó kpak nnap nnəm kpak á mi ka ashe nkpahtak iyaṁ nggo.

¹⁰ Unəm va kpahtak o yar nnap-mbángbang á na te, ya n yar á na chit na kpa. Iyaṁ va kpahtak n yar nnap-mbángbang ka apal ishishi a yà pa nnap nna yà nva mà pa n yar nnap-mbángbang ka apəpal te, ya kakul wo. N nəm ka ashe adin aKəristi.

¹¹ Kakul kan uShetan a nəm igwan ka apal ishi yi ka. Kakul nnap-nnənəm lyat yi ka.

Igwan va í nəm ka atak nkam aKəristi

¹² N ga aTaruwasa pa na n là nnap-nlà aKəristi ngga nchang nfe te, uPonzhi-Inan bol asəsal bol á mi.

¹³ Ka nna kpa te, ìgwak mi ra ka. Kakul n ya ugənanḡ mi uTitus ka ta ka. N ya nləle ka atak wo ka. A nak te, n là óza pa mi gəga. Te n watar n ga mbin aMakidoniya.

¹⁴ ká nnà te, adəḡchī a təm aji Inan chit. Uza va ka ashe aKəristi te, pa dəkər uza ka nlim mpyal ayi wa onəm oga nnəm nchang ìgwak kakul igwan aKəristi. Ka atak yi na uza ka nnak onəm i nyi uKəristi wa nva iyaṁ inəḡnəḡ icháḡchàḡ ka nnəḡ i gang atak pa lat a.

¹⁵ Kaḱul ka atak Inan te, mmayi na i tong wa iyaṃ inənnan aKəristi ichángchàng ka atak onəm va ma kaṃshi oza chit ka onəm va ka nzhì.

¹⁶ Ka atak oro te, nnəng nchángchàng va ta i nəng ka oza wa nnəng ikú va i zhì oza zhì. Oro nnyi te, nnən va ta ngga iriri va i na iriri. Chit te, uda kùr nyar idək apir inok va ta yà?

¹⁷ Mmayi wa aboshi onəm pa kyak oga nra nggang ka nnap-nlà Inan wa iyaṃ iyap jiwo kaṭ. Mmayi ka nla nnap ka ashe aKəristi jiwo ka mpyal Inan wa onəm nnandər pa chak va Inan a re a.

3

Onəm oga nnəm inok nsar nnap-nlà Inan mpipye

¹ Chit te, mmayi ka nsup ishi yi kàḱi na pa har dò? Kaṭ te, mmayi ka ndom awasika aga nshep yi va pa i ba ka wa aboshi onəm dò? Í dom awasika ashep ro va fa ka atak wo ḱakbo?

² Mmawo na ká ishi wo awasika ashep yi va ma lir chit ká igwák wo na nza unəm nggo te, uza a nyinyi nzəng ka nkukun a.

³ A bwam kaṭ. Ma ka n-yiya ka mban pa mmawó awasika aKəristi va ma re yi ka. Awasika va ta ma lir ka ndəng ngga nlir iyaṃ kaṭ. Ma lir ka aRuhu Inan uga Iriri. Ma lir ka apal achuchwal ipang iga nlir iyaṃ kaṭ. Ma lir ka apal achuchwal va igwák onəm a.

⁴ I là nnap-nlà va ta pa pəsak kaḱul Inan i yar anung yi yar kaḱul aKəristi.

⁵ Mmayi ka nla pa i kukur pa i nəm iyam ro ka atak ikàm yi kat. Nkur nnəm iyam yi fa ka atak Inan.

⁶ Kakul uwa nak yi i kur ntong onəm oga nnəm inok nsar nnap-nlà mpipye. Nsar nnap-nlà va ta nnap-mpakpak nlirlir ro kat. ARuhu-Nənan ka, Kakul nnap-mpakpak nlirlir i gbang onəm gbang. ARuhu jiwo te, i nak onəm i lár.

Mbyen nsar nnap-nlà mpipye

⁷ Ma lir nnap inok nnap-mpakpak aMusa ká izər ipang. Ma ru nnəna te, ka yà nzəng ka atak atántàn va byen pa gənggəng har nyar iwu ndər asal awu aMusa ka te, a mat oIsarila mat. A mat oza kakul nsal va asal awu aMusa ka nsal kap ka nva pa atak atántàn tantan i watar watar a. Kap ká ibi byen va ta te, a ba ká ikú.

⁸ Chit te, inok va ija aRuhu va ji ká ichumchum te, i byen i mak i yà wa sang nnyi da?

⁹ A yà pa nnap inok va i ba ká ikú únəm kan a bi byen te, ya inok iga mba ka ntəm nnənan ká Inan te, i byen i ji iva ta ji pa gənggəng.

¹⁰ wantana iyam va ka bi byen matmat te, ibi byen lak chit. A na asal chit iyam va bi byen pa gənggəng a.

¹¹ A yà pa iyam va i watar watar kan ma na te, ka yà nzəng ká ibyen te, ya iyam va təm chit mbyet mbyet te, ibi byen i ji iva ta ji pa gənggəng.

¹² Kakul pa nna i yà ka apir nnak-igwak va ta te, mmayi ka nla nnap pa pəsak.

¹³ I nəm wa nja aMusa kat. Uza dan asal-awu wo dan kakul le kan oIsarila a ya nku ibyen iwatar watar va ta kat.

¹⁴ Ka nna kpa te, anung igwák oza i ya tul chit kat. Kakul har nda ta te, a ya pa mí kun nsar nnap-nlà ngbakgbak te, iyam iga ndan asal-awu va ta nna ka ndan asal-awu ka oza. Na ma tur chit le kat. Kakul ka ashe aKoristi na chwat mí tur i le.

¹⁵ Har nda ilum va pa kpaktak oza i kun nnap-mpakpak aMusa te, iyam iga ndan asal-awu va ta nna ka ndan anung igwák oza.

¹⁶ Ka nna kpa te, a ya pa unem gaban ba atak aPonzhi-Yesu te, mí tur iyam iga ndan asal-awu va ta i le á na.

¹⁷ UPonzhi-Yesu pa te, uwa aRuhu. Atak va kpaktak aRuhu aPonzhi-Yesu ka te, nre izər na ya.

¹⁸ Mmayi, nkpaktak yi ma tur iyam iga ndan asal-awu le ayi chit. Mmayi ka nnyam ibyen aPonzhi-Yesu wa aboka aga nyar alakan lakan. Ma ka nggaban yi na i fa izər ka na ka ibyen va ka ndon ka ndon. Iyam va ta uPonzhi-Yesu va uwa aRuhu te, uwa ka nnənəm.

4

ARuhu Inan va ka nnəm inok ka yi

¹ A ya chit pa ka atak nnyam nrwa igwak Inan kan mmayi ka nnəm inok va ta. Kakul nva ta te, i man izər i ku ka yi kat.

² I swan nnap nnəm mbwambwam ka ngga iwuswa chit ka cho. I nəm iyam ro iga ntan onəm kat. Mmayi ka nzwar nnap-nlà Inan kat kpa. Mmayi ka nnyam nnandər ka mban pa jakjai ka ashe ntəm yi. Na nza unəm nggo a nyi nnandər yi ka ashe idimdim igwak wò ka mpyal Inan.

³ A yà pà nnap-nlà ngga nchang nfe va mmayi ka nla kan a gugún te, ya a gún ka onəm va ka nzhi chwat.

⁴ Oma onəm va na nnandər ká uKərísti ka, ka kul uponzhi uga ashe nra va ta fò anung igwák ka oza chit. Ka kul kang atak atántàn nnap-nlà ngga nchang nfe ka apal ishi ichumchum aKərísti a ghan ôza ka. Uza va pa səlák ká Inan a.

⁵ Ka kul nnap-nlà va mmayi ka nləla ónəm te, ngga ishi yi ka. Mmayi ka nla ka apal ishi aYesu kərísti pa uwa uPonzhi. Mmayi nnyi te, ozwal oga nnəm inok awo ka kul aYesu.

⁶ Ka kul Inan va là pa, <<Re atak atántàn a fa ka ashe afap a ghan.>> Te, uwa nak atak atántàn ka ngghan ka ashe igwák yi. Na a nak onəm a nyi ichumchum chumchum va ka ngghan ka asal awu aKərísti i fa a.

⁷ Ka nna kpa te, iyam ichumchum va mmayi ka te, ka ashe idyéri va ame na pa mwan. Na a nyám pa ichumchum imakmak va ta iji Inan. Iga ishi yi ka.

⁸ Ma ka mbək anung ayi kaşal pa dongdong. Ka nna kpa te, nná chwan yi chit gba ka. Mi i nak iyam i zwar yi. ká nnà te, a rusok izər ayi ka.

⁹ Ma ka nna idumdum ayi. ká nnà te, ma chən pa kpaktak ma re yi ka. Ma tun yi ka mbin. ká nnà te, ma gbán yi ka.

¹⁰ Pa dekər te, ma ka nyar n-yi ayi, na ma dom yi ka apir ikú va uYesu ku. Ná ma nyám apir ntəm aYesu ka atak yi.

¹¹ Ka ashe ntəm yi te, pa dekər te, ma sok yi chit ká ikú ka kul aYesu. Na izər yi iga mbwan a nyám pa uwa yà ká iriri.

¹² A nyan chit pa ikú ka nri yi. Mmawo te, iriri na ka nnəm inok ka ashe wo.

¹³ Ma lir ka ashe nnap-nlà Inan pa, <<N na nnandər na ká Inan. A nak te, n là nnap chit.>> Mmayi ka aruhu aga nna nnandər apir aja anəm va là nnap-nlà va ta. A nak te, mmayi ka nla nnap na kpa.

¹⁴ I nyinyi pa unəm va uwa won ku uPonzhi-Yesu ka atak ikú te, uza i won ka yi won na kpa ka atak ikú kakul aYesu. Uza i ba ka yi nzəng ká wo ka mpyal wò.

¹⁵ Iyam va ta pa kpaktak a yà wanta kakul na o fe nchəchan. Na nnap nnəna Inan a myak a chu onəm pa okyak. I yà pa te, i nak onəm pa okyak i na adəngchi iNan. Na ma rup ka adidin.

Re nnap nnəm yi a ga kà nnap-Inan

¹⁶ Kakul nva ta te, kan i man izər a vang yi kat. Izər yi iga mbwan ka nlak. ARuhu yi jiwo te, nza ilum nggo te, ma ka nnənak i tal apipye.

¹⁷ Iyam va i dak yi nyangmata va iyam va i mor i watar watar te, ka ndamshi asal ayi aga nya iriri iga mbyet mbyet va byen yà ka nla kat a.

¹⁸ Iyam va i pak iwu yi ka te, iyam va iwu i ya kat. Iyam va ta mí ya ká iwu kat. Kakul iyam va iwu ka n-yiya nyangmata te, iyam iwatar watar. Iyam va nnyi iwu yi ka n-yiya nyangmata kat te, iyam va iga mbyet mbyet.

5

¹ I nyinyi pa a yà pa ma shin aghal va izər yi iga apambin va ta te, i ga n-yà ka nzhi va izər va

Inan i ga nnəna ayi kapabur. Izər va ta iga mbyet mbyet. Nzhi va ta awo anəm a me kaṭ.

² Ka ta nyangmata te, mmayi ka nswam nzəng ka ngwan pa ma ka na izər iga apabur va ta ayi.

³ Kaṭul a yà pa mí na izər va ta ayi te, i yà wa ilukwan inənan va i gún imalən yi.

⁴ A yà pa nna i yà ka ashe aghal aga apambin va ta te, i dóm ká izər nrwa kaṭul nyar n-yi va mí yar ayi. Mmayi ka ndum pa i dóm pa ma mandar izər iga apambin va ta a le ayi ka cho dō kaṭ. I dóm pa ma gún yi ká izər iga ntəm ka ashe apabur. Te iyaṃ va ikuku te, iga iriri á maṭan na.

⁵ Inan uwa ká ishi wò dāmshi yi chit kaṭul apir nggaḅan izər va ta. Kaṭul uza na aRuhu wò ayi chit na a nyám ayi pa kpátkpát iyaṃ va uza i ga nnəna ayi a.

⁶ Kaṭul nva ta te, pa dəkər mmayi ka ashe nkam-igwak. A yà pa nna i yà ka ntəm ka ashe izər iga apambin va ta te, i nyinyi pa mmayi ka ntəm nzəng ká uPonzhi-Yesu kaṭ.

⁷ Ntəm yi ntəm ntəm ngga nna nnandər. A yar iyaṃ va iwu i ya kaṭ.

⁸ Igwak kam yi kam nnandər. A kapkap á yi pa i kap áizər va ta na i ga i təm ka atak aPonzhi-Yesu.

⁹ ká nnà te, a yà pa mmayi katətak, kaṭ te ma kap yi kap ka na te, iyaṃ pa izən va i nak ka mpyal yi te, pa i nəm iyaṃ va i chang igwak chang á na.

¹⁰ Kaṭul nkpak pa ma ga ka nkpaktak yi ka mpyal atak ntəm ngga nkat akwali aKərísti. Na nza unəm nggo te, a kam amwa iyaṃ va uza nəm ka ashe izər va ta. Iyaṃ va unəm nəm inənan ká íbángbàng a.

*Inok iga mba ka ntəm inal
ká ishimshe Inan ka onəm*

¹¹ I ra ayər Inan jiyi. A nak te, mmayi ka ndak pa na i dap nnap nnəm onəm na oza a mañ ka. Nnap-nnəm yi nro yà lyat Inan kaṭ. I rən pa o nyinyi pa na kpa ka ashe idim-dim igwak wo.

¹² Mmayi ka nsup ishi yi kàḍi ka mpyal wo kaṭ. Iyam va i dom wo ka te, pa i nak wo o lan ka yi ká ipipir. Na o nyi aman va mal pa o na onəm oga nlan ku unəm va oza nyi iyam va ka ashe igugwak kaṭ a.

¹³ A yà pa i nəm wa onəm va swanggat swanggat te, ya kakul nnəm inok Inan. A ya nnyi pa mmayi ka ashe nnap nnəm yi te, ya kakul nnəm iyam va i kamshi wo.

¹⁴ Mmañ aKəristi nna i nəm ka yi. Kakul nva ta te, i nyinyi pa kpátkpát pa kakul pa unəm uga uzəng va ku chit kakul onəm pa kpaktak te, ya nkpaktak onəm ku chit kpa.

¹⁵ Uza ku kakul onəm pa kpaktak na onəm va ya iriri riri chit te, kan oza a təm ntəm ngga nnəm iyam va oza ya mà ka oza kaṭ. Re oza a təm ntəm nva i mà ku unəm va ku kakul oza a. Ma won ka na ka atak ikú kakul oza na kpa.

¹⁶ N-yanmata jiwo te, i dər unəm ka apal ishi nnap nnəm onəm na chwat lap wa nva apambin i dər kaṭ. Matmat te, ká i dər uKəristi ka apir iwu va ta. N-yanmata te, i dər na ka apir iwu va ta lap kaṭ.

¹⁷ Kakul unəm va pa kpaktak uja aKəristi te, ya uza taḷ unəm upipe chit. Nnap nnənəm mmatmat watar chit. Nyangmata te, uza ka ashe nnap nnəm mpipe.

¹⁸ Iyām va ta pa kpaktak nnəm Inan. Uwa gwang inal chit ka ishimshe yi ká na ka atak inok aKeristi. Uza na inok ayi kpa iga nla nnap ngga mba ka ngwang inal.

¹⁹ Nna pa Inan ka ngwang inal ká ishimshe wò ka apambin ka atak inok aKeristi. Ko uza kung ishi ka mpat nnap mpakpak oza kat. Uza nak idèk nla nnap-nlà ka apal ishi nnap ngwang inal va ta ka ashe awo yi.

²⁰ Kakul nva ta te, mmayi onəm va kaɔor aKeristi. Nna pa Inan ka nram onəm ka atak nnəm inok ka yi a. Mmayi ka nchal wo ka nzhang kaɔor aKeristi pa o gwang inal ká Inan.

²¹ Uza va nyi nnap-mbángbang kat te, Inan nak na wa anəm uga nnap-mbángbang kakul yi na. Na i tong onəm oga nnap nnəm nnənan ka mpyal Inan katetak na.

6

¹ Mmayi ka nnəm inok nzəng ká Inan. Kakul nva ta te, mmayi ka nchal wo ka nzhin pa kan o man nnap nnənan Inan va ka o kam katetak te, kan a tal iyam-lakchi ka atak wo kat.

² Kakul uza là pa,
<<Alulum ba rwam te, n fe ayən bu fe.
N kamshi bu kam ká ilum iga nkamshi onəm.>>
Re n là awo, alum ba rwam chit. N-yanmata na ilum iga nnyam nnap nnənan Inan. Nda na ilum iga nyam nkam-shi ngga iriri.

³ Í tong wa iyam iga nnak unəm ro i ləp ifan kat. Kakul kan ma ya inok yi ká mpat nro kat.

⁴ Kaɔor nva ta te, mmayi ka nnyam nnandər yi ka ka nza asal nggo pa mmayi ozwal Inan. I nyám

ka_ atak nsar igwak pa_ makmak ka_ mbæk anung,
ka_ agan, ka_ ndaktak.

⁵ Ma nēm asap ayi. Ma kuk yi ka_ nzhi ikán. Nvan
pa_ nkyak onēm won ikum ka_ yi. Inok iga ayi pa_
zhalat zhalat. Nro te, nda i ba ayi ká iwu kat. I fe
ka_ ayan.

⁶ I nyám nnandər yi ka_ nnap nnēm nnənan nva yà
ka_ adak ro kat, nzəng ka_ nkpán ipir nnəp, ka_ nkar
igwak, ka_ nnyam nnyi-nnap, ka_ aRuhu-Nənan, ka_
mman ngga nnandər,

⁷ ka_ nla nnandər, ká ichumchum Inan. Nnap-
nnēm nnənan yi wa iyam-wór va í lung ikum ka_
nzəng ka_ ngwang ngwang ngga nka yi.

⁸ Ma ka_ nna ichumchum ayi kan ma ka_ nnēm ka_
yi pa_ vyakshin kpa. Ma ka_ ndəngchi yi. Ma ka_
vyap adin yi kpa. Ma yar yi pa_ mmayi onēm oga
nlam onēm. ká nnà te, mmayi onēm oga nlam
onēm kat.

⁹ Mi i nēm ka_ yi na ma nyi yi kat. Ka_ nna kpa te,
ma nyi yi byet. Bu rən pa_ mmayi ka_ anung ikú.
Ka_ nna kpa te, nna i yà ká iriri. Ma ka_ nnyam ntan
ayi nrwarwa. Ka_ nna kpa te, ma gbán yi kat.

¹⁰ Bu rən pa_ mmayi ka_ ashe nlak-igwak. Ka_ nna
kpa te, pa_ dəkər te, mmayi ka_ ashe nchang igwak.
Bu rən pa_ mmayi onēm oga nkun. Ka_ nna kpa te,
mmayi ka_ nnak onēm pa_ kyak i dur. Bu rən pa_
i ya ká iyam ro kat. ká nnà te, iyam pa_ kpaktak
ijiyi.

¹¹ Ónēm oga aKorinti, i bwam wo ká iyam ro
kat. I bol igwak yi bol awo pa_ kpaktak.

¹² I bwam abo mman nro ka_ atak wo kat.
Mmawo na o bwam mman wo ka_ atak yi.

¹³ Mmami ka nchal wo wa ovan mi pa o bol igwák wo ayi kpa.

Kan iyam ro a yar wo ká nnap onəm oga afap kat

¹⁴ Iyam na pa kpaktak mal kat te, kan o gwang ishi ka onəm oga afap ka nnənəm kat. Iza i gwang iyam inənan ká ibángbàng yà? Iza i gwang atak tantàn ka afap yà?

¹⁵ Iza i gwang uKəristi ka uShetan kan anung oza i yà iyam izəngtəng yà? Iza i gwang unəm uga ngwa Inan ka unəm va wa Inan kat yà?

¹⁶ Nza nsar-nnap i yà ka ishimshe onəm oga ngga awop ka ashe Nzhi Inan ka uga ngga awop ka ashe nzhi ichər yà? Mmayi pa te, i tong wa Nzhi Inan uga Iriri. Inan là pa,

<<Mi təm ka oza.

Mi i chen mi ranggang ka ashe oza.

Mi tal Inan oza.

Oza nnyi te, i tong onəm mi.>>

¹⁷ Kakul nva ta te, Inan là kpa pa,

<<O fa ka ashe oza.

O van ishi wo o fa ka ashe oza.

Kan o dok iyam iga adak ro kat.

Te mi man ká wo dak.>>

¹⁸ <<Na n tal uPon ka atak wo.

O tong ovan mi nnyi, onun-gwan ka ochar.

UPonzhi Inan uga Ichumchum a là iyam va ta.>>

7

¹ Ónəm mi omanman, nsar nnap-nlà va ta pa kpaktak te, ma yar mmayi na. Kakul nva ta te, re i nal ishi yi. I nal adak aga izər yi ka aga igwak

kpa. Re i ra ayər Inan na i nal ishi yi pa chatchat atətak ro a ɓur kaɗ.

Nchan-igwak aBulus

² O bol igwak wo na o maɗ ka yi. I pat nnap únəm ro kaɗ. I nak unəm ro vyap kaɗ kpa. I mwar unəm ro kaɗ.

³ N là nnap va ta kakul pa n dom nnak mpat ro awo dō kaɗ. Kakul ka n là chit pa i maɗ wo pa mɓan-gwak. Ikú te, i ku nzəng ká wo. Ntəm ká iriri te, i təm nzəng ká wo. Iyam ro i kap yi ká wo kaɗ.

⁴ M maɗ ká wo maɗ pa gənggəng. Mmami ka nlan ká wo pa gənggəng. Igwak kam mi pa makmak. Kap ka ndaktak apir pa dongdong va mmami ka ashishe te, igwak chang mi pa gənggəng.

⁵ Nva ká i yà ka Makidoniya te, i jul kaɗ. I wòl che nggo te, mmayi ka ashe ndaktak. Mi i lun yi nlulun va ta ka ngbai. Ka ashe nnyi te, ayər yi ka nlun yi.

⁶ Te Inan uga nsak onəm va igwak oza ra kaɗ te, uza sak yi ka atak mba aTitus.

⁷ Mɓəba na chwata nak igwak yi kam kaɗ. Nkam-igwak va o kam á na ká iyam va uza shal ayi ka apal ishi wo te, a sak yi kpa byet. Uza là ayi pa ndom nya mi lom wo byet. Uza là nnap ayən wo ka mbəl ayi. Ka nnap nyar anung mi va o yiyar ká igwak pa izən. A nak igwak chang mi pa makmak.

⁸ Kap ka nva n nak igwak wo lak ka atak awasika mi va ka n lir awo te, a ɗak mi lap kaɗ. Ka ɗak mi ɗak. Kakul n ya pa awasika mi dungshi

anung ìgwak dungshi awo. Ndunshi ìgwak va ta ga ngwur kaṭ.

⁹ N-yanmata jiwo te, ìgwak ka nchang mi. Igwak ka nchang mi kakul pa n nak ìgwak wo lak kaṭ. Iyam va ka nchang ìgwak á mi te, pa nlak-ìgwak wo nak wo ka nre nnəm nnap-mbángbàng. Igwak lak wo te, o gaḅan wa nva Inan dom. Kakul nva ta te, i na nru ro awo kaṭ.

¹⁰ Apir nlak-ìgwak va Inan i ba ka te, i nak unəm i re nnəm nnap-mbángbàng. I nak te, unəm i ya iriri iga mbyet mbyet. <<Nnyi pa te ya ka ashishe kaṭ.>> Nlak-ìgwak ngga apambin jiwo te, i ba ká ikú.

¹¹ O dər apir iyam va nggaḅan wo nle atak Inan ka nnənəm ka ashe ntəm wo A nak wo ka nzhin ka nnap. A nak ndom nfən ishi wo kakwali lom wo. A nak wo o ram ifan. Icìgwak ləp wo. A nak ndom nya yi lom wo. A nak wo ka nzhin ka nnap. A nak wo ka nnyam ntan ówan wo. Ka ashe nnap va ta pa kpaktak te, o nyám chit pa o ya ka mpat ro ka pa dap kaṭ.

¹² Káp ka nva pa n lir awasika va ta lir awo te, n lir kakul anəm uga mpat nnap ka ashe wo na chwat ku unəm va ma lak ìgwak á na dò kaṭ. N lir pa na a nyám awo ká ishi wo ka mpyal Inan pa o zhin ka nnap yi ga ləlak.

¹³ Kakul nva ta te, o kam ìgwak kam ayi. A kùr ka nkam ìgwak ayi na chwat kaṭ. A chang izər ayi byet kakul nchang ìgwak aTitus. Igwak chang na kakul nkpaktak wo har a nak igugwak ra.

¹⁴ Ka n là á na chit pa mi ləlan dap ká wo. Te o na iwuswa á mi kaṭ. Wa nva iyam va i là awo nnandər te, wa nnà ta kpa nlan yi ká wo ka mpyal

aTitus a yà akwam kat.

¹⁵ Uza i rəng nva nkpaktak wo o tong onəm oga nkpak nnap nnəm á na te, mməman kakul wo ji mmatmat ji. Nna o kam na ka ashe nnap nnəm wa nva iyam i lom unəm. O nakshi ka na pa dakdak a ga wà ñzam.

¹⁶ Igwak chang mi pa gənggəng kakul n nyinyi pa iyam ro yà i dan mi ka nləp ikwoksok ká wo pa shat kat. Ishimshe mi ká wo byen chit kađi.

8

Nna but iyam inana onəm oga ngwa Inan

¹ Ógəng, i dom wo pa o nyi apir nnap nnənan va Inan na íkílisiya iga mbin aMakidoniya.

² Káp ká nva pa mma mà oza ká mbək anung mmakmak kang pa oza kun fər wa nchwani te, oza ka ashe nchang igwak pa gənggəng. Nchàng igwak va ta nak oza ká nnyám nnyi nnàp pa zhalat zhalat.

³ Mi ləla pa oza na iyam màl ka atak ñyi oza. Oza na ga watar nva pa ma là pa onəm wa njo oza à na. Oza na ká mman oza.

⁴ Oza chál yi ká nzhin pa ma man óza a yà ká awo ka ashe nna nkamshi kakul onəm Inan.

⁵ Oza na nkamshi va ta ji nkam iyam va i rəng pa oza i na. Nggəshi te, oza na ishi oza na mpyal ûPonzhi uYesu kang. Te oza na ishi oza á yi kpa mà dakdak ká ndom Inan.

⁶ I ya pa te, i chál uTitus pa uza a ga mpyal ká nnəm inok va uza wa ban nnənəm ka ashe wo a. I chál na pa uza a kamshi wo o gbañ nnəm inok va ta.

⁷ O nyáng onəm nyáng ka iyam pa kpaktak. Nna nnandər wo mpəpar yà kaṭ. Unəm uro kúr ká wo kà nnap-nlà Inan ónəm kaṭ. Apir nnyi wo mpəpar yà kaṭ. Unəm uro kúr ká wo kà nnəm nnàp ká nzhin kaṭ. Unəm uro chu ká wo ká mman yi kaṭ. Kaḱul nva ta te, re o nyáng onəm pa kpaktak kà nnap nnyám nnyi nnap ngga nkamshi onəm va ka ashe nlang.

⁸ Mmami kà nnak nkpak a wo ka apal ishi nnap va ta kaṭ. N dom pa i nnyi apir nlom va nna nkamshi ónəm oga nkun ka nlom oro. Te mi nnyi nnandər mman wo.

⁹ O nnyi apir nnap nnənan aPonzhi yi uYesu Kəristi nnyi. Kap ka nva pa uza dudur te, uza tal unəm uga nkun kaḱul wo. Na ka atak nkukun na te, o dur.

¹⁰ Ichən va ta mi na ka apal ishi nnap va ta. Iyam va byen ji te, nyangmata te, re o gbaḱ ka nkwap iyam va ka o ban nkukwap chit kazhen. Nnəm pa dom wo dom ká igwak.

¹¹ Re o gbaḱ ka nnəm iyam va ta wa nva lom ka nnəm ká igwak a. O nəm a mal ka atak n-yi wo.

¹² Kaḱul a yà pa igwak iga nna iyam iya ya ka ashe wo te, Inan i kam iyam va kam ó na. Uza i kam iyam va unəm yà ka kaṭ dō kaṭ. Iyam va unəm ka te, nna uza kam.

¹³ I dom pa oro a jujul kan mmawó te ma kar wo ká idək kaṭ.

¹⁴ I dom pa nza nnap nggo te, a yà nkár. N-yanmata te, mmawó ka ntəm ntəm ashik, Kaḱul nva ta te, o kpaḱ 0o na ónəm va ka ashe nlan. Te ó won o yà ka ashe nlan nnyi te, ntəm ashik oza i kamshi wo. Na iyam a yà nkár.

15 Ma lir ka ashe nnap-nlà Inan pa, <<Unəm va kwap iyam pa makmak te, a ji nkəkam kaṭ. Unəm va kwap nnyi pa dap te, a yen na kaṭ.>>

Ma re uTitus ga aKorinti

16 N dɛngchi Inan va nak ká ìgwak aTitus pa uza a zhat ka nnap nkamshi wo wa nva uza nak ka ashe ìgwak mi kpa a.

17 Nfe ayən yi na chwata nak na ka ndom mba atak wo kaṭ. Uza ká ishi wò te, ngga atak wo lom na lom nna. Unəm ro a nak na ka kaṭ.

18 Mmayi ka nre ugənanang ro nzəng ka na. Uza ka adin anənan ka ashe nkpaṭak ikílsiya kakul nla nnap-nlà Inan ngga chang nfe va uza là ózə a.

19 Nna ta chwata kaṭ. Ikílsiya yak na yak pa uza a ra nggang a nəm inok iga nnyi-nnap va ta nzəng ka yi. Inok va ta mmayi ka nnənəm kakul nrup ka adin aPonzhi-Yesu. Na i nyám kpa pa i kamshi onəm kamshi.

20 Mmayi ka nnəm pa dakdak kakul le kan unəm ro a vyap adin yi ka apal ishi asal va mmayi ka nnəm ká imwa va ta kaṭ. Imwa va ma na mbál awo ro yà ka kaṭ a.

21 Kakul mmayi ka ndak pa gənggəng pa i nəm iyam va i məma ka mpyal aPonzhi-Yesu ka mpyal onəm kpa.

22 Mmayi ka nre ugənanang yi uro nzəng ka oza kpa. Ugənan va i mà nvan pa nkyak kan í ya pa uza i zhin ka nnap zhin. N-yanmata te, a dudon kakul uza man ká wo man pa gənggəng.

23 UTitus jiwo te, uza uwan mi uga nnəm inok nzəng ka mi kakul wo. Abo ogənan va nzəng ka

na te, oza ba ka ashe adin ikilisiya. Inok oza inok iga mba ka nrup ka adin aPonzhiYesu.

²⁴ Kakul nva ta te, re o nyam onem va ta pa nna o ya ka mman. O nyam oza iyam va nak kan mmayi ka nlan pa shat ka wo. Na oga ikilisiya a man ka kpa.

9

Ma but iyam onem Inan

¹ Nkpak pa n lir awasika awo jiwo ka apal ishi nnap nkwap iyam kakul onem Inan kat.

² Kakul n nyi ndak wo nyi ka apal ishi nnap va ta. A nak te, mmami ka nlan pa shat ka mpyal oganan oga mbin aMakidoniya, mi la oza pa oganan oga mbin Akaya gbal ka damshi izer chit matmat ka azhen ka nnap va ta. Nzhin wo ka nnem nnap yenda mmakmak oza yenda.

³ Ka nna kpa te, mmami ka nre oganan va ta na nlan yi pa shat ka wo te, kan a wal atam alakchi kat. Na ma ya wo o gbal ka damshi izer chit na nnan wa nva n la a.

⁴ Kakul mo te, oganan oga mbin aMakidoniya ro a yar nvan mi a ba atak wo te, kan oza a ba a ya nna o gbal ka damshi izer chit kat. I ya pa te, i yar iwuswa. Iwuswa va o yar jiwo te, i byen nla kat. Kakul i lep ikwoksok lep ka wo.

⁵ Nna nak te, n ya biyen pa oganan va ta a ba atak wo kan mi ba pa shiriri. Na oza a mor a gbal ka nkwap imwa wo kan mi ba. Imwa va ka o yar nsar nnap-nla pa o na a. Te i ya dak pa o na a. Te i ya dak pa o iyam va igwak wo dom. Ma nak nkpak awo ka nnena kat.

⁶ Iyām va mal pa ma rən te, unəm va kpaktak i suk iyām i makmak kat te, uza i bən iyām i makmak kat na kpa. Unəm va i suk iyām i məmāk te, uza i bən iyām i məmāk.

⁷ Re nza unəm nggo te, uza a nəm iyām va uza yar ká igwak wò pa o nəm. Kan a yà pa iyām va a chang únəm ká igwak kat dò kat. Kan uza a nəm bu là pa ma nak nkpak á na ka nnənəm kat. Unəm va i na iyām ka ashe nchang igwak te, uwa Inan i man ka.

⁸ Inan uwa yà ká ichumchum pa o na iyām awo va ji nkam iyām va ji o dom. Na pa dəkər te, o ya ka ashe ashik. Kakul nva ta te, o na iyām kakul inok inənan kang mbál awo ro a yà ka ashishe kat.

⁹ Ma lir ka ashe nnap-nlà Inan pa,
<<Uza kap achan ónəm oga nkun chit ká imwa wò.

Nnyi-nnənap təm chit mbyet mbyet.>>

¹⁰ Unəm va uwa na apir aga nsuk únəm uga nsuk iyām kan uwa kpa i na ipir-kur kakul iyām-nrì te, uwa i na apir aga nsuk awo. Uza i nak i fu pa makmak. Uza i nak nnap nnənən awo pa makmak ka apal ishi inok iga nnyi-nnap wo.

¹¹ Uza i nak wo o dur ka apal ishi nkpaktak iyām. Na pa dəkər te, o na iyām pa makmak. Iyām va o na ta te, i sat iyām iga nnak mí na adəngchi íNan.

¹² Inok va mmawó ka nnənəm ta te, i nəm ikún ndaktak ónəm Inan na chwat kat. Ka nnak adəngchi va mí na íNan te, ka mmakmak pa gənggəng.

¹³ Inok wo inənan va ta te, nna nnyam-nnap ka apal ishi nna nnandər wo ká ishi wò. I nak te,

mí na adəngchi íNan kəkul nkpak nnap nnəm wo. Kəkul o maṇ ka nnap-nlā aKəristi ngga nchang nfe maṇ. Kan kəkul nkamshi va o re nre ózā ka abo oro. Awo bál ká wo ka nnəna kaṭ.

¹⁴ Kəkukul na te, oza i far Inan kəkul wo. Ayan nya wo i ji oza byet. Kəkul nnap nnənaṇ va Inan na wo mak ga watar ñzam a.

¹⁵ Ma na adəngchi íNan kəkul imumwa va mak yà ka nla kaṭ.

10

UBulus damshi akwam va mí nap ka apal ishishi

¹ Mmami uBulus ká ishi mi ka nchal wo kəkul mmami unəm uga nnap nnəm ngga nra ishi ka ngga nra igwak wa aKəristi na kpa. Mmami ka nchal wo pa o gwong achwang ka mi. Onəm i là pa mi yà nzəng ká wo te, mi nəm pa mu. Mi re atak wo te, mi nəm nnap pa kakkərak.

² Mmami ka nchal wo pa kan o nak mà ba te, mà sam ká wo kaṭ. Wa nva mi nəm ka onəm va ka nla pa i nəm nnap wa onəm oga apambin a.

³ Kap ka nva pa mmayi ka ashe apambin te, i lun ikum yi apir nlun-ikum ngga apambin kaṭ.

⁴ Kəkul iyaṁ-wór yi ija anəm kaṭ. Iyaṁ-wór yi iji Inan ifárfár iga ndəshin iyaṁ-wór anəm-kum Inan.

⁵ Í shin mpyen-tam anəm i le ayi ka cho. Í shin nrup ká ishi ngga nka asaḷ aga nnyi Inan. Í ri nza apir nrən-nnap nggo ká ikum, í nak oza i kpak nnap nnəm úKəristi.

⁶ I gbar izər chit kan i lok pa i nyám ntan únəm uga nlan nnap nnəm, a yà pa o nyám chit pa mmawó onəm oga nkpak nnap nnəm a.

⁷ O dər iyam va ra awo ka mpyal pa jakjai. A yà pa unəm ro nyi pa kpátkpát pa mmawò uja aKərísti te, re uza a rən kpa pa mmayi oja aKərísti wa njini.

⁸ Ko ka ya pa n lan ká ichumchum va uPonzhi-Yesu na yi watar ñzam watar pa dap te, i nəm iwuswa á mi kat. Ichumchum va ta pa te, uPonzhi-Yesu a na ayi kakul mme wo. Uza na yi kakul nshin wo kat.

⁹ Kang a wong a yà pa mmami ka nnak ayər pa a nəm wo ka atak awasika mi kat.

¹⁰ Kakul oro ka nla pa, <<Awasika wasika ka nnap-nlà ndəkdək nkamkam. Kang bu ya na ká iwu te, uza kam kat. Nnap nlà va i fa katətam te, a kur iyam ro kat.>>

¹¹ Re apir onəm wa ova ta a nyi pa iyam va i yà nzəng ka oza kat kan i lir ka ashe awasika yi te, nna i nəm a yà pa i yà nzəng ka oza a.

¹² Ko pa dap i gwang ishi yi ka onəm oga nsup ishi oza kat. I mal ishi yi ka oza kat kpa. Oza i mal nnap nnəm oza ka nnap nnəm va oma pak. Oza i mo izər oza ká izəzər pa uyan pa dí ka uyan.

¹³ Ka nna kpa te, í lan i watar atak va mal kat. Í lan i mal dakdak ka aswari va Inan pa ayi a. Mmawo ka ashe akyer va ma pa ayi.

¹⁴ I watar aswari chit ká inok kat. O nəm bu là mo te mmayi na i nəm ká wo kat. Kakul mmayi na ka ga gbang ji ka nnap-nlà ngga nchang nfe ka apal ishi aKərísti.

¹⁵ I watar aswari ka nlan yi kat. Í lan ká inok onəm ro kat kpa. Mmayi ka nnak igwak pa nna nnandər wo i ga mpyal ka mmak. Te aswari inok yi ka ashe wo i ya ka mbol ka mbol pa gənggəng.

¹⁶ Na a nak i ga ka nnap-nlà Inan ngga nchang nfe ka mbin va watar njiwo watar a. I dom pa kan i lan kə ngwur va unəm ukak a wap kat.

¹⁷ Nnap nlà Inan là pa, <<Unəm va kpaktak ka nlan te, re uza a lan ku uPonzhi-Yesu wa.>>

¹⁸ Unəm uga nsup ishi wò ro yà Inan i man ka na kat. Unəm va uPonzhi-Yesu ka ndənchi na te, uwa Inan i man ka na.

11

Nnap onəm oga nre aKəristi oga akwam

¹ Ko o məman te, ka o kar igwak kar ka nnəm mpərək mi pa dap. Kusuk kusuk o kar igwak ka mi.

² Mmami ká ikpar kakul wo ka apir ikpar Inan. Mmawo wa ayenbyen. Uyen byen va n na anung chit pa mi na na úKəristi ká ivan na uza a tal ubəbar pa uzəng.

³ Ayər ka nnəm mi. Kakul kan a won a yà wa nva izwa ka tan uHawawu ka ntan te, nna-ishì wo va o na úKəristi ngga nnandər va akwam ro ya ka ashishe kat te, kan ma zwar wo o le ka na o re kat.

⁴ A yà pa unəm ro a ba atak wo a là nnap aYesu ukak awo uva ká i là awo kat, kat te o kam aRuhu akak va ka o kam ka atak yi kat, kat te o kam aRuhu akak va ka o kam ka atak yi kat, kat te o kam nnap-nlà ngga nchang nfe nkak nva ka o kam ka atak yi kat te, ya o mor o kam nchwatchwat byet

⁵ N rən pa onəm va o yar oza pa onəm oga nre aKeristi pa ka nva oza kasəsal kat te, oza ji mi ka iya ro kat.

⁶ Ko ka ya pa m mwan wa nsan nggo ka nla nnap-nla ngga abələm te, nnyi yen mi jiwo kat. Iya va ta i nak wo chit o nyi pa kpátkpát ka ka nza asal nggo kan ka ashe nza iya nggo kpa.

⁷ Nva n yen ka ishi mi kakul na a rup ka wo te, n nəm mpat dakbo? Nna n là nnap-nla Inan ngga nchang nfe awo n nak wo o mwa iya ro kat te, a bəban dō?

⁸ A tal chit na n vyat iya ka ifan ka ikilisiya iro kakul na n nəm inok awo ka. Kakul i kam iya kam kawo oza iga nkamshi yi.

⁹ Ka n ya nzəng ka wo kang ka n ya ka ashe nlang te, n dak unəm ro ka ashe wo kat. Kakul ogənanng va ba ka mbin aMakidoniya te, oma na nkpaktak iya va á mi n dom. A nak te, n dak ka ndak wo ka pa dap kat. Mi dak wo ka pa dap kat na pa har.

¹⁰ Kakul nnandər aKeristi va nna ya ka ashe mi te, ka unəm ro ya ka ashe mbin Akaya kur ndat mi ka nlan nlan mi va ta kat.

¹¹ Iza nak kan n là pa ya? Kakul pa m man wo kat dakbo? Inan ka ishi wo nyinyi pa m man wo man.

¹² Iya va mmami ka nnənəm nyangmata te, mi ga mpyal ka nnənəm kakul na n kur akwam onəm va ka nləp ikwoksok pa mmawó ka nnəm inok va mmayi ka nnənəm kpa a.

¹³ Apir onəm va ta onəm oga nre aKeristi oga akwam. Oza onəm oga nnəm inok iga nlam atak.

Oza i nēm akwam pa oza onēm oga nre aKeristi oga nnandər.

¹⁴ Nna nak te, uShetan ká ishi wò te, i won te, i nnēm akwam pa mmawò unēm uga nre Inan uga atak atántàn.

¹⁵ Kakul nva ta te, iyam iga ndaktak ka, a yà pa onēm oga nnēm inunok kà nlam onēm pa oza onēm oga nnēm inok oga nnap nnənan a. Kalum aga nkùr te, mí mwa oza i mal dakdak ka apal ishi iyam va oza nēm.

*Mbək anung va uBulus bək
wa anəm uga nre aKeristi*

¹⁶ Mi la mi dēdan kàdi pa kan unēm ro a rən pa mmami mpərək ka. A byen ku unēm te, re uza a yar mi pa mpərək na n ya asal pa dap aga nnok pa shat.

¹⁷ Iyam va mmami ka nləla ta iga nnok te, iyam va uPonzhi-Yesu a dom mi pa n lə ka. Mmami ka nla nnap wa anəm uga mpərək uga nnok pa gənggəng.

¹⁸ Onēm pa kyak ka nnok ka nnap nnēm nja anēm. A nak te, mi nok na kpa.

¹⁹ Nkar-igwak ka oga mpərək nna i sher ishi awo ka dakbo? Mmawo va o yar pa o tətan a.

²⁰ Unēm i nēm izwal awo wa nsan nggo te, o kar igwak ka na kar. Ko uza a vyat iyam ká wo ká ifan, ka te amwar wo, ka te a bák ntan awo, ka te a ta njan awo wa nsan nggo te, o kar igwak ka na pa fəm.

²¹ Kakul pa n kam ka te, i kur nnənəm awo pa jiyi ka ke? Re n lə nnap-nlā awo wa anəm uga mpərək va pa har. A yà pa unēm ro rən pa o

nunok ka apal ishi iyam ro te, nna n ya ka iyam va mi nok ka na kpa.

²² A ya pa oza i nok pa o fa kakum-ijili alBerahim te, n fa kakukum na kpa. A ya pa oza i nok pa oza oIsarila te, mmami pa na kpa. A ya pa oza ovan oga ngwur iyam-kup alBerahim te, mmami uzentən na kpa ka ashe onəm va ta.

²³ A ya pa oza i nok pa oza onəm oga nnəm inok aKeristi te, n ji oza ji. Mmami ka nla nnap wa anəm-ranran. M bək anung ka inok pa makmak ji oza ji. Ma kùk mi ka nzhi ikan nvang pa nkyák. Ma nəm asap á mi ya ka nkun kat. M bək anung n dat ka ikú nvan pa nkyak.

²⁴ Nvan pa ntukun onəm ochumchum oYahudi nak ma nəm nnəm á mi apir nva i dat pa nzəng i yél isəm neding a.

²⁵ Nvang pa nshadən onəm ochumchum oRoma nak ma nəm mi ka idari acham. Ma kwan mi ka ipang nvang pa nzəng. Nvang pa nshat agirgi ndəng achumchum chwan ka ashe iwa nna ka n ya ka ashishe. Agirgi chwan n yel ka ashe iwa ka apal akpasal akun ka izwam atak tan alum chen ga tar pa chit.

²⁶ Pa dekər te, mmami ka ashe achen. Oga awan va m pan te, abang alakchi kat. Onəm oga nra anyimnyal ka nəm ka mi san nggo te, ka nənəm. N tar awo owan mi oYahudi tar va abang alakchi kat a. N tar awo onəm va oYahudi kat kpa. Oza abang alakchi kat na kpa. Onəm dom ka mi dom ka ashe itong. Iyam iga ashe anyin va abang alakchi kat te, ka ri nggom ri ka mi. Ndən iwa va n achen ka ashishe te, abang alakchi kat. Ogənan

oga akwam dom ka mi dom.

²⁷ N nyi iyam va nyi mi wor pa unem i bek anung ka inok. N lan nda lan. A yan nyan ka mi nyan nzeng ka ndeng-ngbal. Nvan pa nkyak n lan iyam-nri. N fe ka atak-rusok fe. N nyi iyam va nyi mi wor pa nlan iyam iga mpa ka izer.

²⁸ Kap ka nkpaktak iyam va ta te, pa dekər mmami ka nfe ka idək ndaktak kakul ndom ngga ashe igwak mi ka apal ishi ikilisiya.

²⁹ Uda ka ashe ikilisiya uza kam kat kan a nak izer ya ka mi pa yakap na kpa kat ya? Uda ka ashe wo lep ifan kan a nak izer rwa mi kat ya?

³⁰ A ya pa nkpak pa n lan te, ya mi lan ka iyam va i nyam pa mmami pa te, n kam kat a.

³¹ Inan uPo aPonzhi-Yesu va adengchi tem ajini chit mbyet mbyet te, uza nyinyi pa akwam mmami ka nnenap kat.

³² Ka aDemaska te, ugomna uga nnem ka atak va ta uwa ka akum Aritas uPonzhi te, uza nak ma panchi anung-asal atak va ta na ma kpán mi.

³³ Te ogenan re mi n fer ka ashe anap ka mbol ro ngga izer anang akamselang va gang itong va ta. A nak te, uza chu nkpan mi kat.

12

Iyam va uBulus ya ka ashe alár

¹ Mi ga mpyal ka nnok. Kap ka nva pa iyam ro ya byen ka ashishe kat te, mi la nnap iyam ro va n ya ka ashe alár va uPonzhi-Yesu a nyam á mi a.

² N nyi unem ro nyi uja aKeristi a nem izun chit pa igbapchi aman pa neding uva ma yar na ba ga apabur akurkur. Ma yar na ba ga ka ashe izer

nggo, kaṭ te ka ashe izər kaṭ te, n nyi kaṭ. Inan uwa nyi.

³ N nyinyi pa ma yar na ba ga atak njul pa shat ka apabur. Ma yar na ba ga ka ashe izər nggo, kaṭ te ka ashe izər kaṭ te, n nyi kaṭ. Inan uwa nyi.

⁴ Iyaṃ va uza fe ka achwang te, mí là kaṭ. Apir oza unəm ya ká ichumchum iga nləla kaṭ.

⁵ Mi lan ku unəm va ta lan. Kapal-ishi abo iyaṃ jiwo te, mi lan ká iyaṃ ro i watar nnap nnəm mi ngga nnəm wa anəm va kam kaṭ.

⁶ Ka nna kpa te, a ya pa mà dom nlan te, nnəm mpərək kaṭ. Kaṭul nnandər mmami ka nləla. Ka nna kpa te, mi nəm kaṭ. Kaṭul kan unəm ro a yar pa mmamiyaṃ va a ji nya va ji uza ya mi, ká iyaṃ va uza ka nfife ka anung mi kaṭ.

⁷ Te kaṭul kan ma rup ká ishi kaṭ, ka apal ishi nnyam iyaṃ imakmak va Inan nyám á mi te, ma re iyaṃ ro i gup ngup ka mi ka ashe izər wa izu va maṭ ka mmyar na unəm a jul a. A taṭ wa anəm uga nre aShetan va dat ka mi, i nyan ka mi byet. Kaṭul kan mà rup ká ishi kaṭ.

⁸ Nvang chit pa nshadən n chál uPonzhi-Yesu pa a nak iyaṃ va ta a kap ka mi.

⁹ Ka nna kpa te, uza là á mi pa, <<Nnap-nnənan mi kur bu kur. Kaṭul ikàm mí yəl inok wò ka ashe onəm va kam kaṭ a.>> Kaṭul nva ta te, mi ga mpyal ka nlan pa shat ka nlan ikàm mi va ta. Ná n ya ikàm aKərísti.

¹⁰ Kaṭul nva ta te, a chàng igwak á mi nva n kam kaṭ, ka mmwàn va ma ka mmwàn mi, ka mbək anung va mmami ka mbəbək, ka nsur va ka nya mi, ka ndaktak va ka nzul mi kaṭul aKərísti a. Kaṭul ilum va kpaktak mi lan ikàm ka te, awalang

va ta mi kam.

Nnap-nnəm onəm oga aKorinti ngga ndak uBulus

¹¹ N nəm chit wa mpərək. Mmawo na o nak mi ka nnəm pa. A mal pa ka o ya ka ndənchi mi. Ka kul ka pa dap onəm oga nla pa oza onəm oga nre aKəristi va ka nva oza kasəsal ka te, oza ji mi ka iya ro ka.

¹² N nəm iya nəm awo va i nyám pa mmami unəm uga nre aKəristi unandər. N nəm iya va ta ka ashe nkar-igwak mmakmak. N nəm iya ichumchum iga ndaktak pa dongdong awo.

¹³ Nza asal i nəm ka aboshi ikilisiya kan i nəm awo jiwo ka ya? Ya nva pa n na njul awo chwat. N dak wo ka pa dap ka. Ya mi chal wo pa o yar nnap-mbángbang á mi ka kul mpat va ta chwat dak.

¹⁴ N-yanmata te, n gbal chit ka ndamshi izər ka kul mba atak wo nshishat. Mi dak wo ka kul iya ro ka. Ka kul mi dóm ka iya wo iro ka. Mmawo na ka ishishi rwa mi. Ka kul a mal pa ovan ma a but iya a nak ka kul opo oza ka. Opon oma i but iya i nak ka kul ovan oza a.

¹⁵ Mi lak awo lak ka kul wo ka nchang igwak. Mi gbal nkam mi gbal ka kul wo kpa. A ya pa mi man wo pa makmak te, o man mi pa dapfinyan dò?

¹⁶ Re ma la pa n dak uro ka ashe wo ka na nna. Te ó la dak pa n nyám ntan awo m mwar wo ka ashe ntan dò?

¹⁷ Mo te, m mwar wo ka atak onəm va ka nre ka atak wo dakbo?

¹⁸ Ka n chal uTitus pa a ga atak wo ku ugənan va n re na nzəng ka na a. Te uTitus mwar wo

mwar ɗakbo? ARuhu va ka nnəm ka na te, nna ka nnəm ka yi kpa kaɗ dō? Iyaṃ va uza nəm te, i nəm kaṣal azəngtəng ka na kaɗ dō?

¹⁹ Wi, matmat te mmawó ka mpak inok nrəng pa mmayi ka nfən ishi yi kakwali ro ka mpyal wo ɗakbo? O'o pa kaɗ. I là iyaṃ va ta ka mpyal Inan na. Mmayi oja aKərísti. Ónəm mi omanman, iyaṃ va i là pa kpaktak te, kakul mme mmawó na.

²⁰ Ka nnəm ayər á mi pa kan a won a yà pa mà ba te, mà ya wo wa nva n dom kaɗ. Mmawo nnyi te, ó ya mi wa nva o dom kaɗ kpa. Mo te, mi ya wo ka ashe ndap-zər, ka nnəm ikpar owan wo, ka nnyam nfəl-igwak owan wo, ka ndom ishi, ka nvyap adin owan wo, ka nnap atoli, ka nrup ká ishi, ka ngwon nnap nnəm.

²¹ Ka nnəm ayər á mi pa kan a yà pa mà ba atak wo kàɗi te, Inan i nak iwuswa a nəm mi ka mpyal wo kaɗ. I nak te, mi yəng pa gbəmgbəm kakul wo pa kyák. Kakul onəm va nəm nnap-mbángbang chit kang oza yang ka nggaḅan nrəre a. Oza na ishi oza ka nnəm ilakchi iga nnəm mmai ka ovan byen, ka nnəm iyaṃ iga nlan iwuswa.

13

Awon aga nkùr anung

¹ Mmami ka mba atak wo nshishat. Mi ba nshishat wa nva nnap-nlà Inan là pa, <<Ka atak nnap-nlà onəm pa oparəm, kaɗ te pa oshadən va ya iyaṃ va ya fa te, kaɗetak mí gəl akwali.>>

² Onəm va ka nəm nnap-mbángbang matmat ka ashe wo ka aboshi wo pa kpaktak te, n dom nla awo ka nva pa nyangmata n yà nzəng ká wo kaɗ

te, mmami ka ngwon wo. Wa nva n nəm ka mba mi nvaṇ pa mparəm te, mi ba te, mi re oza kaṭ.

³ A yà pa o dom nnyi pa ká ichumchum aKeristi mmami ka nla nnap te, ó yiya. Kakul uza te, uza lan ikàm kaṭ. Uza ka ashe wo wa anəm ukamkam.

⁴ Kakul kap ka nva pa ma pak na ka apal akun ikú uza yà ká ikàm ro kaṭ te, nyangmata uza uriri ka atak ichumchum Inan. I yà ká ikàm kaṭ na kpa wa njini. Ka nna kpa te, ka atak ichumchum Inan na i lár nzəng ka na, na i nyi iyam va í nəm awo.

⁵ O mo ishi wo pa dakdak o dər mo te nna o yà ka ashe nna nnandər wo nggo. O mà ishi wo. Pa uKeristi uwa ya ka ashe igwák wo te, o nyi kaṭ dō? Kaṭ te, ya o ru mmà ishi wo va ka o mà chit.

⁶ N rən pa o nyinyi ká ishi wo pa i ru mmà ro jiyi kaṭ.

⁷ Mmayi ka nchal Inan pa kan o pat iyam ro kaṭ. Nva pa onəm i ya yi pa i ru mmà nro kaṭ te, nna rwa yi kaṭ. Iyam va rwa yi te, pa o nəm iyam va dakdak a. Nna kap ka nva pa o rən pa i yiyen a.

⁸ Kakul nva pa i vyap nnandər te, i yà ka nnəm kaṭ. Iyam va i nak nnandər i kam te, nna í nəm.

⁹ I chang igwak chang a yà pa i kam kaṭ kan o kəkam jiwo a. Achal yi na ta pa o tong onəm va kukur.

¹⁰ N lir iyam va ta awo wanta nnà n yà ka atak wo kaṭ te, kakul pa mà ba te, kang mà sam ka wo ká ichumchum va uPonzhi-Yesu na mi kaṭ. Ichumchum va kakul mme wo a. Kakul nshin wo kaṭ.

Nre-anung ngga ngwachi nnap-nlà

¹¹ Ka nkùkùr te, ôgənanɡ re o jul ká ikáɡkáɡ. Kan i ɡwang. O zhiɡ ka ntong onəm nənən. O nakshi nak ká iyam va n chál wo pa o nəm. O maɲ owan wo. O təm ntəm ikáɡkáɡ ka owan wo. Te Inan uɡa mba ka mmaɲ ka nna nra-ìɡwak i təm nzəɡ ká wo.

¹² O re anung re ówan wo ka ashe mmaɲ.

¹³ Nkpaktak onəm Inan oɡa atak va ta ka nre anung áwo.

¹⁴ Re nnap nnənən aPonzhi-Yesu Kəristi ka mmaɲ Inan, ka mmaɲ izər aRuhu-Nənən a təm nzəɡ ká wo pa kpaktak.

Tarok Bible

The Holy Bible in the Tarok language of Nigeria

copyright © 2024 Luke Initiative for Scripture Translation

Language: (Tarok)

Contributor: The Seed Company

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 19 Dec 2025 from source files dated 10 Jul 2025

501af3c5-12fd-5965-ade7-9600b2d02717